

## **Qaasuitsup Kommuniata Katersugaasiveqarfia – Killiffiit takorluukkallu:**

Aallarniutigalugu erseqqissaatigissavara Qaasuitsup Kommuniani katersugaasiviit ilusissaattut Kalaallit Nunaanni katersugaasiviit kattuffiannit NUKAKA-mit innersuussutigineqartut, aammalu 2007-imi 2008-milu KANUKOKA-mut kommuninullu tamanut nassiussuunneqarsimasut tunngavigineqarmata. Paasivarput 2008-mi ukiakkut isumasioqatigiinnermi aaqqissuussaanermut siunnersuut taanna Qaasuitsup Kommuniani ikaarsaarnermut ataatsimiititaliamut saqqummiunneqarsimasoq.

Naatsumik oqaatigalugu ilusissaq taanna atorlugu Qaasuitsup Kommuniani tamarmiusumi katersugaasiviit inatsisit malillugit aammalu katersugaasivinni sulianut naleqquttumik ingerlanneqarnissaat qulakkeerneqartussaavoq, aamma katersugaasiviit arlallit piffissami sivikinnerusumi sivilunerusumiluunniit pisortaqaangikkaluarpata.

Tassalu katersugaasivinnut pisortamik, Qaasuitsup kommuniani katersugaasiviit ingerlanneqarnerini pingaarnertut akisussaasuusussamik atorfinitsitsinissaq naatsorsuutigaarput.

Ataatsimut isigalugu attaveqatigiinnermik networkingimik taasinnaasatsinnik aallartitsererpugut. Misilittakkanik, isumassarsianik suliniutinillu avitseqatigiiffiusumik. Isorartuumi suleqatigiittoqassappat aqutissat arlallit pisariaqartinneqartussaapput:

1. Attaveqatigiinnermi aqutissanik pitsanngorsaaneq. Matumani oqarasuaatikkut atortullu digitaliusut atorlugit ataatsimiittarnerit pitsanngorsarneqarnissaat eqqarsaatigaarput. Listserverinik atuinerit, oqarasuaatitigut ataatsimiittarnerit aammalu atortut digitaliusut periarfissarititaat ingerlaavartumik misissorlugit sulinerput ingerlareerpoq.
2. Aamma ornigulluni ataatsimeeqatigiittarnissat ingerlanneqartartussaapput, pilersaarutigaarpullu illoqarfiit paarlakaajaallugit ataatsimeeqatigiittarniarluta, taamaalilluta suleqatigut najugaannut tikeraarsinnaassavagut, tamattalu illoqarfinni ataasiakkaani suut ajornartorsiutigineqarnerisut isitsinnik takusinnaassavagut. Ornigulluni ataatsimeeqatigiittarnerni aamma pikkorissartitsinernik periarfissaqassaagut – taakkunanilu avataaniit pikkorissartitsisussanik qaaqqusisinnaassaagut, imaluunniit suleqatitigut misilittagaqarnerusut pikkorissartitsisorisinnaassallugit. Periarfissaq taanna pingaaruteqartorujussuuartut isigaarput, sulisut ilinniaqqittarnerat ineriartoqqittarnerallu suliffeqarfiup pissanganartup pilerinartorlu piorsarneqarnerani pingaaruteqarmata.


Taamaattumik Kalaallit Nunaata avannaani angallannikkut pissutsit Qaasuitsup Kommuniata iluani ataatsimiittarnernut taama annertutigisumik ajornakusoortitsisuusarmata ugguarisorujussuuarput – matumani pingaartumik illoqarfiit Qasigiannugit, Qeqertarsuup, Uummannap aamma Qaanaap akornanni angallannikkut akimmisaarfiit ilisimaneqarluartut eqqarsaatigineqarput.

Ilutsinni suleqatigiillu akornanni suliatta nukittorsarneqarnissaannik kissaateqarnitta saniatigut, tamatta suliassaqarfimmut ilivitsuusumut angisuumut ilaanerput avammut takutikkusupparput. Najukkatsinni illoqarfiit oqaluttuarisaanerisa saniatigut katersugaasiviit tamarmik immikkut avammut ilisaritinnissaat misilissavarput. Illoqarfinni tamani katersugaasivimmut pulaartarneq assigiimmik misigineqartassanngilaq – ilisarititsissutaasut assigiinngitsuussapput, taamaalillunilu katersugaasivimmut iserfigisimanngisamut pulaarnerit tamaasa nutaanik ilikkagassaqaarsinnaassaaq. Tamatuma peqatigisaanik ilisarititsissutaasut kommunimi kulturikkut pinngortitalu oqaluttuarisaanerinit uppernarsaasiortarnermut akisussaaffiit isumagineqartuarnissaat ~~Katersugaasivimmut~~ ~~akornanni~~ ~~suliatta~~ ~~nukittuunik~~, soqutigisaqarfinnik ukiut kingulliit ingerlanerini toqqarneqartarsimasunik ilisarititsissuteqareerput.

Qarasaasianut immiussisarnermi Qaasuitsup Kommuniani nukittuumik inissisimanissarput kissaatigaarput. Kommunimi katersugaasiviit pioreersut suliassaqarfimmi tassani ineriartornermi siuarsimasut takusareerparput – tamatumalu katersugaasivinnut allanut sunniuteqarnissaa takorusuttorujussuuarput. Matumani arlallit eqqarsaatigineqartussaapput:

1. Katersugaasivimmi katersugaatit qarasaasiakkut nalunaarsuiffimmut akuerisamut REGON-  
imut nalunaarsorlugit qarasaasianut immiussineq saqqummiussinerlu (internettikkut)
2. Pappiaraatit toqqortarineqartut qarasaasianut immiunneqarneri saqqummiunneqarnerilu  
(internettikkut)
3. Assit katersaatit qarasaasianut immiunneqarneri saqqummiunneqarnerilu (internettikkut)

## Qaasuitsoq



Budget 2008: 5.767.000 Kr

Pulaarsimasut: 26.897

Illut: 30

Sulisut: 13,4